

Ruffinà e spannegiant fin l'ultima pagina

In nov crimi tudestg da Daniel Badraun

DA CLAUDIA CADRUVI / ANR

■ **Marguerite Duval è renumada e temeraria. La scriptura duai vegnir maz-zada. En il Palace a San Murezzan obte-gna ella visitas da dus cumpogns bruts. Uschia cumenza «Rheinfall» da Daniel Badraun. Il crimi è gist ord stampa.** Ella ha lunas, aliras da star e di senza mastegiar ils peds, tge ch'ella pensa. Ed ella scriva era senza prender resguard ni sin Pieder ni sin Paul. Perquai ha Marguerite Duval blers inimis. En ses pli nov cudesch vul ella publitgar las intrigas da Peter Hofer, il retg d'antennas da Schaffusa. Sche quest cudesch cumpares, muntass quai ins scandal en il qual era ils politichers e schizunt las organisaziuns d'ambient fissan involvadas. Pertge Hofer ha unshè tuts per pudair installar sias antennas.

Da San Murezzan a Schaffusa

Malgrà massivas smanatschas ch'ins vegnia a mazzar Marguerite Duval, vul l'autura preleger en il teater da la citad a Schaffusa ord ses nov manuscript. Quella decisiun prenda ella a San Murezzan. Curt sissura visitan dus cumpogns dubius l'autura en sia stanza dal Palace. Duval mitscha.

L'emprim fuja ella a pe vers il Güglia e suenter per autostop. La notg passenta ella en ina cabina da telefon a Casti. L'auter di vegn Duval arrestada. Ses manager Jean-Pierre Murat salva ella ord la situaziun desperada e proveda ella – sco adina – cun medicaments calmants.

Il crimi che cumenza en il Grischun sa splega en sia part principala en il conturn da Schaffusa. Là viva Margrittlì Durrer che vegn plegendanda en ina bar. In tip remartgabel dumonda, sch'ella na less betg far il double per la renumada autura Marguerite Duval. Lezza dovria ruaua e stuess avair insatgi che remplazia ella per in temp. Margrittlì, che su-

meglia fitg la scriptura, sa lascha en sin la fatschenta.

Marguerite e Margrittlì

A la Cascada dal Rain, amez la truscha da turists, vegnan las duas persunas barrattadas ora. Margrittlì daventa la dama Duval. Cun levezza sa schluita ella en sia rolla e dat anc sper la cascada ina intervista a la televisiun locala.

Ma cura che Margrittlì sesa en l'auto sper il manager, s'accorscha ella svelto che betg tut è uschè schuber ed innocent sco quai ch'ins l'aveva fatg crair. La vaira scriptura Duval vegn rappinada suenter in accident da traffic. Il manager Murat sa cuntegna curius. El ha para ina relaziun cun la schurnalista da la «Glücks-Fee» Linda Steiner, era sch'el vala gea uffizialmain sco amant da la Duval. E lura datti anc l'editura Helena Brauer che vul impedir ch'ils novs cudeschs da Duval cumparian en in'otra chasa editura. Margrittlì vegn en las stretgas e sto tuttenina temair per sia pel, ma era per la vita da Duval.

In crimi d'emprima classa

Daniel Badraun raquinta cun tempo e chapescha da laschar coier cun flomma regulara l'attenziun dal lectur. Ins na po betg metter pli or da maun il cudesch ina giada ch'ins ha legì las emprimas paginas. L'istorgia è plain ligns ed engiavineras. Mintga giada che l'autur schlia in lign, metta el ora novs latschs. Tgi smanatscha Marguerite Duval? Tgi surveglia mintga pass da Margrittlì Durrer? Sto ina da las duas protagonistas laschar la vita? Tgenina tutga la balla dal morder che planischa ses assassinat a lunga vista fin en l'utlim detagl?

Il crimi è cumponì a moda ruffinada. I dat ina entira rotscha da persunas che vegnan en dumonda sco malfatschents. Badraun gioga cun questas persunas, uschia ch'ins na sa mai precis, tgi che tu-



tga tar ils buns e tgi tar ils nauschs. È il manager uss l'ami che manegia mo bain cun Marguerite Duval? U cugliuna el ella davon e davos?

Sco tar mintga bun crimi sa schlian ils gronds ligns pir en l'ultim chapitel. E sco quai ch'i tutga per in fitg bun crimi, salva Badraun per las ultimas frusas anc ina bella surpraisa – ina surpraisa ch'ins ha forsà sminà, ma n'è fin l'ultim mument betg stà segir, sch'ella sa verifitgeschia.

Daniel Badraun: «Rheinfall». Chasa editura Limmat. 200 paginas. 29.50 francs. Turitg 2009.

Daniel Badraun (48 onns) è creschi si a Samedan. El è scolast, politicher ed autur e viva en il chantun Turgovia. MAD